

**Ethica Symbolica E Fabularum Umbris In Veritatis Lucem
Varia Ervditione Noviter evoluta**

Pexenfelder, Michael

Monachii, 1675

Ethicè.

[urn:nbn:de:hbz:466:1-68709](#)

SYMBOLVM LXXXII.

Campi Elysii.

6. Æneid.

Ethicè.

Quanta felicitas in sedibus Beatorum.

Est nunc animus à Tragicis his spectaculis avocandus, & ad Elysia
Beatorum viridaria advertendus. De his Poëta loc. cit.

Devenere locos lātos, & amāena vireta
Fortunatorum nemorum, sedēsque beatas.
Largior hīc campos æther, & lumine vestit
Purpureo, Solēmque suum, sua sidera norunt.
Pars in gramineis exercent membra palæstris,
Contendunt ludo, & fulva luctantur arena.
Pars pedibus plaudunt choreas, & carmina dicunt,
Nec non Threicius longa cum veste Sacerdos
Obloquitur numeris septem discrimina vocum;
Iāque eadem digitis, jam pectine pulsat eburno.

Ethica.

(a) Usque adeò homines, variarum etiam superstitionum tenebris in-
voluti, ipso naturæ lumine perspexerunt, esse Dominum aliquem supre-
num, *Mentemque cælestem*, quæ debitis pœnis in sceleratos animadver-
tat: probos autem & virtute præstantes præmiis remuneretur. Hinc
Tartarus, dirissimus impiorum carcer: hinc *Campi Elysii*, Beatorum sedes,
omni voluptatum genere affuentes. Quid, quod subterraneum etiam
quondam locum lustrandis & expiandis Manibus agnoscebant, in quo
ubi essent animæ ab omni humana colluvie, & contagione corporis ex-
purgatae, tunc in Elysios transmittebantur Hortos; si modò fuissent eius
generis peccata, quæ possent aliqua ratione lustrari & expiari. Idcirco
Virgilius ex antiquorum sententia. 6. Æneid.

Ergo exercentur pœnis, veterūmque malorum
Supplicia expendunt: aliæ panduntur inanæ.

R r r

Suspensæ

(a) Sedes Beatorum.

Suspense ad ventos : aliis sub gurgite vasto
 Infectum eluitur scelus , aut exuritur igni ;
 Quisque suos patimur Manes. Exinde per amplum
 Mittimus Elysium.

Facundi sunt Poëtae in describendis illis sive Campis , sive Insulis Fortunatis. Est enim ibi cælum nullo terræ anhelitu grave, crassumque; sed salubre , ac verna quadam temperatione pacatum. Non iners illic ac torpidum gelu , non horridus rigor , non amnes & torrentes frigoribus conglaciantes , nivib[us]que & pruina concrescentes ; non torridi solis æstus, & calores urentes. Absunt tenebre , caligines , nebulæ , nubes , venti, procellæ , turbines , fulmina , imbræ , grandines : Contingua ibi , & pura semper lucis claritas cum cæli facie serenissima , & astrorum electioribus effectis. Viridaria illic perennium rivulorum cursibus , recursibus, ac mæandris , irrigua ; quorum aquulæ vitro pellucidiores ad lapillos molliter allisæ , dulcissimè strepitant : nihil ibi noxium , nihil non ad usum aliquem gignitur : oculos pascit viridianum arborum voluptas : auditum mirabiliter recreant aviculæ dulcissimis cantibus concertantes , lenib[us]que auris perstrictæ arborum comæ placidum murmurantes. Nares odoribus ambrosiis , quos efflant aromata , flores , herbe , perfunduntur : Gustatui sua item è saporibus gratissimis oblectatio carpitur : sensum tactio- nis nulla laedit asperitas : omnia mollia , omnia temperata. Juvat ibi- dem ad suavissimos modulos agitare choros , implere calathos liliis , fra- grantes legere violas , & variis sese floribus coronare. Modò libet in florido gramine , modò sub umbrosa jacere platano , & amicissimos ser- mones conferre. Quid quod etiam felicium illorum nemorum incola iisdem exercentur studiis (sed longè jueundiore modo) quibus teneban- tur in vita. Summa inter eos pax & concordia ; ideoque Æneas

Arma procul , currūsque virūm miratur inanes ,
 Stant terrā defixa hastæ : passimque soluti
 Per campos pascuntur equi : quæ gratia currūm ,
 Armorūmque fuit vivis , quæ cura nitentes
 Pascere equos , eadem sequitur tellure reposos.

Verbo nihil loco , nihil habitatoribus ad omnem amœnitatem & voluptatem deest. Et hæc de sensuum deliciis. De intelligentia quid dicam ? veteres certè Philosophi , teste Cicer. lib. 5. de fini. finge- bant , in Beatorum insulis , maximum oblectamentum ex eo existere , quod omni cura liberati , nullum necessarium vitæ cultum , aut paratum requirentes , nihil

nihil aliud agant, nisi ut omne tempus inquirendo ac discendo, in naturæ investigatione consumant. Atque hic prætereundum non est, quod Poëta Elysii dignam viridariis canit, quintuplicem hominum sortem. Scilicet:

--- qui ob patriam pugnando vulnera passi:
Quique Sacerdotes casti, dum vita manebat:
Quique pii vates, & Phœbo digna locuti:
Inventas aut qui vitam excoluere per artes:
Quique suū memores alios fecere merendo:
Omnibus his niveā cinguntur tempora vittā.

Felices igitur tērque, quatérque, qui charitate patriæ, castimoniā
vitæ, veracitate linguae, industriā ingenii, officiorum promptitudine se-
des sibi tam amoenas, tam jucundas, beatas, fortunatas comparant & in-
habitant. Apagite vos Athei, qui cælum & inferos tollitis; qui ne qui-
dem in fabulis audire sustinetis.

Esse aliquos manes, & subterranea regna,

Et contum, & stygio ranas in gurgite nigras:

Atque unā transire vadum tot millia eymbā. *Iuvenal. Sat. 2.*

Sunt enimvero, sunt improbis supplicia, probis autem constituta
præmia: alterutrum citius, seriūsve sentiet, quisquis vitam vel ad vir-
tutis leges exigit, vel pudoris & honestatis repagula refringit. Quod
Poëta fabularum velo involuerunt, hoc explicat Christiana Religio, Deum
esse, malorum vindicem, bonorum Remuneratorem, & unumquemque re-
cepitrum propria corporis, prout gessit, sive bonum, sive malum. 2. Cor.
5. Ideoque claudamus cum Poëta nostro:

Et dubitamus adhuc virtutem extendere factis?

